



SLUŽBENE NOVINE TUZLANSKOG KANTONA

GODINA 23 • TUZLA, PETAK 09. DECEMBAR 2016. GODINE • IZDANJE NA BOSANSKOM JEZIKU • BROJ 13

903

Na osnovu člana 24. stav 1. tačka c) Ustava Tuzlanskog kantona („Službene novine Tuzlansko-podrinjskog kantona“, br. 7/97 i 3/99 i „Službene novine Tuzlanskog kantona“, br. 13/99, 10/00, 14/02, 6/04 i 10/04), na prijedlog Vlade Tuzlanskog kantona, Skupština Tuzlanskog kantona, na sjednici održanoj 30.11.2016. godine, donosi

Z A K O N

O SPREČAVANJU NASILJA I NEDOLIČNOG PONAŠANJA NA SPORTSKIM PRIREDBAMA

I. OSNOVNE ODREDBE

Član 1.

(Predmet zakona)

Ovim zakonom utvrđuju se mjere za sprečavanje nasilja i nedoličnog ponašanja na sportskim priredbama i u vezi sa sportskim priredbama, kao i obaveza organizatora i ovlaštenja nadležnih organa u provođenju tih mjera na području Tuzlanskog kantona (u daljem tekstu: Kanton), te se propisuju:

- protivpravna ponašanja učesnika sportske priredbe prije, za vrijeme i nakon sportske priredbe;
- mjere za sprečavanje nasilja i nedoličnog ponašanja;
- obaveze i odgovornosti sportskog saveza, organizatora sportske priredbe i gostujućeg sportskog kluba;
- standardi koje moraju ispunjavati sportski objekti;
- mjere koje se poduzimaju na sportskoj priredbi povećanog rizika;
- kaznene odredbe za prekršioce odredbi ovog zakona;
- nadležnosti za vršenje nadzora nad provođenjem zakona.

Član 2.

(Primjena drugih zakona)

Na pitanja koja nisu uređena ovim zakonom, primjenjivat će se odredbe Zakona o javnom okupljanju („Službene novine Tuzlanskog kantona“, br. 1/12 i 11/15) i Zakona o sportu („Službene novine Tuzlanskog kantona“, broj: 8/10).

Član (3)

(Značenje izraza)

Pojmovi korišteni u ovom zakonu imaju sljedeća značenja:

- Sportske priredbe su organizovana sportska okupljanja i sportska takmičenja.
- Organizator sportske priredbe, (u daljem tekstu: organizator) je sportski savez, sportsko društvo, sportski klub, te drugo pravno i fizičko lice registrovano za obavljanje sportskih djelatnosti u skladu sa zakonom, koje se stalno ili privremeno bavi organizacijom sportskih priredbi, odnosno koje je preuzelo organizovanje određene sportske priredbe, ili vršenje određenih poslova u organizovanju sportske priredbe.

c) Vrijeme održavanja sportske priredbe je vremenski period potreban za organizovan i siguran dolazak i ulazak gledalaca u sportski objekat prije početka sportske priredbe, vrijeme trajanja same sportske priredbe, te vrijeme potrebno za njihov siguran izlazak iz sportskog objekta i odlazak nakon njenog završetka, a čije trajanje u svakom konkretnom slučaju utvrđuje organizator u saradnji sa Upravom policije Ministarstva unutrašnjih poslova Tuzlanskog kantona (u daljem tekstu: Uprava policije), prilagođavajući dužinu tog vremena karakteru sportskih priredbi (npr. sportske priredbe povećanog rizika).

d) Učesnici sportske priredbe su sva lica prisutna na sportskoj priredbi.

e) Sportski objekat je zatvoreni i otvoreni objekat namijenjen za održavanje sportskih priredbi, koji pored sportskih terena može imati i gledalište. Sportskim objektom u smislu ovog zakona smatra se i drugi zatvoreni ili otvoreni objekat koji služi obavljanju drugih djelatnosti kada se povremeno koristi za sportsko takmičenje.

f) Sportski teren je prostor na kome se obavlja sportska priredba, kao i prostor do gledališta.

g) Gledalište je uređen prostor u sportskom objektu namijenjen za smještaj gledalaca.

h) Alkoholnim pićem u smislu ovog zakona smatra se svako piće koje sadrži alkohol.

Član 4.

(Definicije nasilja i nedoličnog ponašanja)

(1) Pod nasiljem na sportskim priredbama, u smislu ovog zakona, smatra se:

- fizički napad na učesnike sportske priredbe;
- fizički obračun između učesnika na sportskoj priredbi van terena;
- bacanje na sportski teren ili u gledalište predmeta koji mogu da ugroze život, fizički integritet lica ili imovinu;

d) isticanje obilježja, transparenata, te izvikivanje slogana kojima se podstiče rasna, vjerska, nacionalna ili druga netrpeljivost i mržnja, odnosno čiji je sadržaj uvredljiv i nepristojan, a što može da dovede do fizičkih sukoba navijača ili drugih učesnika, te ugrozi život ili integritet lica, odnosno oštećenje ili uništenje imovine, te paljenje navijačkih obilježja;

e) oštećivanje sportskog objekta, opreme, uređaja i instalacija na sportskom objektu na kome se održava sportska priredba;

f) izazivanje nereda prilikom dolaska, odnosno odlaska sa sportskog objekta ili u sportskom objektu, ometanje toka sportske priredbe ili ugrožavanje sigurnosti učesnika sportske priredbe ili trećih lica;

g) korištenje pirotehničkih sredstava i drugih predmeta i sredstava kojima se može ugroziti sigurnost učesnika na sportskoj priredbi ili ometati njen tok;

h) paljenje navijačkih rekvizita i drugih predmeta.

(2) Pod nedoličnim ponašanjem na sportskim priredbama, u smislu ovog zakona, smatra se:

a) neovlašteni ulazak na sportski teren;

b) neovlašteni ulazak u službene prostorije i službene prolaze sportskog objekta na kome se održava sportska priredba;

c) unošenje u sportski objekat i upotreba alkohola ili drugih opojnih sredstava;

d) unošenje u sportski objekat pirotehničkih sredstava i drugih predmeta i sredstava kojima se može ugroziti sigurnost učesnika u sportskoj priredbi ili ometati njen tok;

e) neovlašteni ulazak u dio gledališta sportskog objekta namijenjen suparničkim navijačima;

f) neovlašteni korištenje dronova bez saglasnosti nadležnog organa;

g) maskiranje lica kapom, maramom, šalom ili na drugi način radi prikrivanja identiteta.

II. STANDARDI KOJE MORAJU ISPUNJAVATI SPORTSKI OBJEKTI

Član 5.

(Plan evakuacije i certifikat sigurnosti objekta)

(1) Sportski objekat mora imati plan evakuacije, ovjeren od strane nadležne policijske uprave.

(2) Plan evakuacije mora sadržavati opisane procedure postupanja u slučaju vanrednih situacija (rušenje konstrukcija, požar, nestanak svjetla, masovni neredi, dojava o podmetnutim minsko-eksplozivnim sredstvima i sl.) kao i jasan šematski prikaz evakuacionih koridora.

(3) Sportski objekat koji je kategorisan kao objekat za međunarodne sportske manifestacije, mora imati certifikat o sigurnosti objekta (stadiona) ovjeren od strane Ministarstva unutrašnjih poslova Tuzlanskog kantona (u daljem tekstu: Ministarstvo).

(4) Certifikat o sigurnosti objekta se izdaje na rok od godinu dana, a na osnovu prethodno izvedenih pozitivnih inspeksijskih nalaza iz oblasti elektrozaštite, gromobranske zaštite, protivpožarne zaštite, opremljenosti sredstvima i opremom za pružanje prve pomoći, higijensko-tehničke ispravnosti toaleta, statičke nosivosti karakterističnih konstrukcija, ulazno-izlaznih kapija, koridora i zaštitne ograde.

(5) Organizator je dužan osigurati da se sportska priredba održi u sportskom objektu koji ima:

a) odgovarajuće ograde za sprečavanje ulaska gledalaca na sportski teren;

b) odgovarajući broj jasno i vidljivo obilježenih ulaza i izlaza prema svim dijelovima gledališta;

c) odgovarajuća sjedišta koja se ne mogu otkinuti samo korištenjem fizičke snage;

d) prostoriju za pružanje hitne medicinske pomoći;

e) odgovarajući broj muških i ženskih mokrih čvorova u svim dijelovima gledališta;

f) sistem javnog razglasa;

g) odgovarajuće osvjjetljenje ukoliko se sportska priredba održava u večernjim satima, kao i osigurano neprekidno napajanje električnom energijom.

(6) Pored uslova iz stavova (1) do (5) ovog člana, organizator priredbe povećanog rizika je dužan osigurati da se sportska priredba održi u sportskom objektu koji ima:

a) odgovarajuće ograde ispred sportskog objekta za usmjeravanje i razdvajanje suparničkih grupa navijača;

b) odgovarajuće ograde za razdvajanje suparničkih grupa navijača u gledalištu;

c) odgovarajući prostor za policijskog službenika, nadležnog za održavanje javnog reda i mira na sportskoj priredbi sa kojeg ima jasan pregled sportskog terena i gledališta;

d) tehničku opremu za praćenje i snimanje ponašanja gledalaca na sportskom objektu;

e) prostor za siguran smještaj prevoznih sredstava gostujućih klubova.

(7) Bliže uslove iz stavova (1) do (6) ovog člana i njihovu ispunjenost utvrđuje nadležni sportski savez, odnosno sportska organizacija uz prethodno pribavljeno mišljenje Ministarstva obrazovanja, nauke, kulture i sporta Tuzlanskog kantona i saglasnost Ministarstva.

III. DUŽNOSTI ORGANIZATORA

Član 6.

(Dužnosti organizatora)

(1) Organizator, u saradnji sa policijskim službenicima Uprave policije (u daljem tekstu: policijski službenik), dužan je osigurati održavanje sportske priredbe i poduzeti mjere kojima se predupređuje i sprečava izbijanje nasilja i nedoličnog ponašanja gledalaca, i to:

a) preventivne mjere;

b) redovne mjere koje se poduzimaju na svim sportskim priredbama;

c) mjere koje se poduzimaju na sportskim priredbama povećanog rizika;

d) mjere koje poduzima Ministarstvo, sudovi i zavodi za izdržavanje prekršajnih kazni.

(2) Kad sportska organizacija povjeri organizaciju sportske priredbe ili vršenje određenih poslova u organizaciji sportske priredbe drugom pravnom ili fizičkom licu, dužna je vršiti nadzor nad provođenjem mjera utvrđenih ovim zakonom.

IV. MJERE ZA SPREČAVANJE NASILJA I NEDOLIČNOG PONAŠANJA NA SPORTSKIM PRIREDBAMA

1. Preventivne i redovne mjere

Član 7.

(Preventivne mjere)

U cilju preventivnog djelovanja i smanjenja rizika izbijanja nasilja i nedoličnog ponašanja gledalaca, sportske organizacije dužne su da:

a) podstiču organizovanje i sportsko (fair play) ponašanje svojih navijača i njihovih klubova;

b) provode odgovarajuće informisanje svojih navijača (sastanci sa navijačima, izdavanje biltena i dr.);

c) koordiniraju sa klubovima svojih navijača prilikom organizovanog odlaska na gostujuće sportske priredbe;

d) urede sportskim pravilima iz svoje nadležnosti koje se sportske priredbe smatraju sa povećanim rizikom i koje mjere su organizatori i drugi učesnici dužni da poduzmu, u skladu sa zakonom i drugim propisima, na sportskim priredbama povećanog rizika;

e) podstiču pozitivno ponašanje i djelovanje igrača i službenih lica za vrijeme ili nakon održavanja sportske priredbe;

f) poduzmu druge mjere i aktivnosti u skladu sa zakonom, propisima donesenim na osnovu zakona i sportskim pravilima.

Član 8.

(Redarska služba)

(1) Organizator je dužan da obrazuje odgovarajuću redarsku službu, ili da angažuje pravno lice ili poduzetnika radi obavljanja poslova fizičkog osiguranja i održavanja reda na sportskoj priredbi (u daljem tekstu: redarska služba).

(2) Prilikom vršenja poslova iz stava (1) ovog člana redarska služba je ovlaštena da:

a) zabrani pristup sportskom objektu licima koja su pod uticajem alkohola ili drugih opojnih sredstava ili se iz njihovog ponašanja može zaključiti da su skloni nasilnom ili nedoličnom ponašanju;

b) efikasno odvoji gostujuće navijače usmjeravanjem na posebne ulaze i izlaze iz sportskih objekata i poseban dio gledališta koji je za njih određen;

c) onemogući ulazak gledalaca na sportski teren;

d) onemogući unošenje ili prodaju u sportskom objektu alkoholnih pića ili drugih pića u staklenim flašama i čašama;

e) onemogući unošenje u sportski objekat predmeta koji se mogu upotrijebiti u nasilničkim postupanjima (pirotehnička sredstva, palice, flaše i sl.), odnosno kojima se može ometati tok sportske priredbe (ogledala, laserski pokazivači, zvučni uređaji veće snage, transparenti ili obilježja kojima se podstiče rasna, vjerska, nacionalna ili druga netrpeljivost i mržnja, odnosno čiji je sadržaj uvredljiv ili nepristojan i sl.);

f) upozori, odnosno udalji gledaoce zbog nedoličnog ponašanja, kojim se može izazvati nasilje na sportskoj priredbi ili ometati njen tok.

(3) Kad gledalac ili grupa gledalaca postupi suprotno nalogima redarske službe ili izazove nasilje, o tome se bez odlaganja obavještava policijski službenik.

Član 9.

(Prisustvo pratćih službi)

(1) Organizator je dužan da blagovremeno ostvari saradnju sa Ministarstvom i osigura prisustvo policijskih službenika na priredbama povećanog rizika, a u ostalim slučajevima kada procijeni da je to potrebno radi provođenja mjera i naloga koji se odnose na održavanje javnog reda i mira.

(2) Organizator je dužan da za vrijeme sportske priredbe osigura prisustvo odgovarajuće službe hitne medicinske pomoći i vatrogasne jedinice, kao i da ostvari saradnju, a po potrebi poduzme mjere da osigura i prisustvo drugih nadležnih organa i organizacija, javnih službi i javnih poduzeća (inspekcije i komunalne službe i dr.).

(3) Organizator je dužan dostaviti prijavu o održavanju sportske priredbe sedam dana prije održavanja sportske priredbe policijskoj stanici na čijem području se održava sportska priredba.

(4) Policijska stanica, na osnovu prijave organizatora o održavanju sportske priredbe i ocjene relevantnih elemenata o rizicima ugrožavanja stanja

sigurnosti i poduzetih mjera organizatora, određuje broj i postupke policijskih službenika koji osiguravaju javni red i mir na određenoj sportskoj priredbi.

Član 10.

(Evidencije navijača)

(1) Organizator je dužan da, u saradnji sa sportskim klubovima koji učestvuju u sportskoj priredbi i klubovima njihovih navijača, osigura vođenje evidencije o identitetima lica kojima se ulaznice prodaju, odnosno ustupaju preko klubova navijača, kao i da omogući uvid u te evidencije ovlaštenom licu Ministarstva.

(2) Podatke o maloljetnim licima je potrebno da da njihov roditelj, staratelj i dr.

(3) Uprava policije je dužna uspostaviti i uredno voditi evidenciju lica kojima je izrečena zabrana prisustvovanja određenim sportskim priredbama.

2. Mjere koje se poduzimaju na sportskoj priredbi povećanog rizika

Član 11.

(Sportske priredbe povećanog rizika)

(1) Sportske priredbe povećanog rizika su:

a) domaće i međunarodne sportske priredbe od većeg takmičarskog značaja;

b) sportske priredbe na kojima se prema procjeni organizatora očekuje prisustvo velikog broja gledalaca i navijača gostujućih klubova;

c) druge sportske priredbe kod kojih, prema procjeni organizatora, posebne okolnosti ukazuju da na njima može doći do nasilja i nedoličnog ponašanja gledalaca.

(2) Nadležni sportski savez određuje svojim aktom koje se domaće i međunarodne sportske priredbe, u smislu stava (1) tačka a) ovog člana, mogu smatrati od većeg takmičarskog značaja.

(3) Policijska stanica će, po zaprimljenom obavještenju od strane organizatora o vremenu održavanja sportske priredbe povećanog rizika, odrediti policijskog službenika ovlaštenog za koordinaciju ukupnih aktivnosti svih subjekata koji učestvuju u organizaciji te sportske priredbe, kako bi sve preventivne, redovne i posebne mjere određene ovim zakonom nadležni organ i službe poduzeli blagovremeno i efikasno.

Član 12.

(Dužnosti organizatora sportske priredbe povećanog rizika)

(1) U situacijama u kojima okolnosti iz člana 11. ovog zakona ukazuju na rizik od izbijanja nasilja i nedoličnog ponašanja gledalaca na sportskoj priredbi, organizator je dužan da:

a) o tim okolnostima obavijesti, bez odlaganja, a najkasnije u roku 48 sati prije početka sportske priredbe, Upravu policije i druge nadležne organe, nadležni sportski savez i druge zainteresovane sportske organizacije, kao i sportiste koji učestvuju u sportskoj priredbi;

b) odredi odgovorno lice koje je zaduženo za rukovođenje provođenjem mjera za sprečavanje nedoličnog ponašanja gledalaca i za saradnju sa Upravom policije;

c) ostvari saradnju sa Ministarstvom, radi postupanja po nalogima koji se odnose na osiguranje javnog reda i mira na sportskoj priredbi i radi osiguranja rada dežurnog sudijske za prekršaje;

d) ostvari saradnju sa predstavnicima klubova navijača u cilju međusobne razmjene informacija i osiguranja da klubovi navijača odrede dio redara na sportskoj priredbi iz svojih redova, radi pomoći u održavanju reda na sportskoj priredbi i obavještavanja gledalaca.

(2) Organizator, u saradnji sa ovlaštenim policijskim službenikom iz člana 11. stav (3) ovog zakona, može prekinuti sportsku priredbu i odrediti da se isprazni dio ili cijelo gledalište u slučaju masovnog izražavanja rasne, vjerske, nacionalne ili druge netrpeljivosti i mržnje.

(3) Nakon praznjenja gledališta, sportska priredba se može nastaviti ili odložiti u skladu sa važećim pravilima.

Član 13.

(Zabrana prodaje alkoholnih pića)

(1) Zabranjena je prodaja alkoholnih pića na prilazima, u neposrednoj blizini i u sportskom objektu, tri sata prije i tri sata po završetku sportske priredbe, kao i za vrijeme njenog održavanja.

(2) Bezalkoholna pića se mogu prodavati samo ako su u papirnatim ili otvorenim plastičnim posudama.

Član 14.

(Razdvajanje navijača)

Organizator je dužan da prije početka, za vrijeme trajanja i po završetku sportske priredbe povećanog rizika:

a) omogućiti odvajanje grupa gostujućih navijača prodajom ulaznica na odvojenim i posebnim prodajnim mjestima;

b) omogućiti da se u prodaju puste samo ulaznice za mjesta za sjedenje, odnosno onoliki broj ulaznica za stajanje koji, u zavisnosti od kapaciteta sportskog objekta, ne ugrožava sigurnost učesnika sportske priredbe;

c) ostvari saradnju sa sportskim klubovima koji učestvuju u sportskoj priredbi u pogledu prodaje ulaznica za njihove navijače;

d) odredi posebne ulaze, izlaze i dio gledališta za grupe gostujućih navijača, ukoliko se očekuje njihov organizovani dolazak i odlazak u većem broju;

e) osigura preko programa sportske priredbe ili drugih sredstava informisanja podsticanje gledalaca na korektno ponašanje.

Član 15.

(Zabrana prodaje ulaznica na dan održavanja sportske priredbe povećanog rizika)

Na dan održavanja priredbe povećanog rizika ulaznice se po pravilu ne mogu prodavati u sportskom objektu na kome se priredba održava ili u njenoj neposrednoj blizini, već samo na posebnim prodajnim mjestima.

Član 16.

(Obaveze gostujućeg sportskog kluba)

Gostujući sportski klub koji učestvuje na sportskoj priredbi povećanog rizika obavezan je da:

a) najkasnije tri dana prije organizovanog polaska navijača na sportsku priredbu obavijesti organizatora o svim elementima bitnim za prijem kluba i njegovih navijača (dan i vrijeme polaska, procjena broja navijača koji dolaze, način prijevoza, mjesto boravka ili okupljanja, imena vođa navijača i sl.);

b) ostvari saradnju sa klubom svojih navijača i učestvuje u organizaciji njihovog dolaska na sportsku priredbu;

c) osigura raspodjelu karata za svoje navijače koje je dobio od organizatora;

d) poduzme druge potrebne mjere da klub i njegovi navijači ne budu uzrok nasilja i nedoličnog ponašanja na sportskoj priredbi.

3. Mjere koje poduzima Ministarstvo

Član 17.

(Nadležnost Ministarstva)

(1) Ministarstvo pred sportsku priredbu povećanog rizika, najmanje 24 sata prije njenog početka, vrši pregled sportskog objekta na kome će se sportska priredba održati i ostvaruje uvid u organizacione pripreme, te osigurava da objekat blagovremeno, u skladu sa važećim procedurama, bude pretražen radi otkrivanja prisustva eventualno podmetnutih eksplozivnih sredstava.

(2) Ministarstvo, prilikom održavanja sportskih priredbi povećanog rizika, može da naloži poduzimanje svih potrebnih mjera za sprečavanje nasilja i nedoličnog ponašanja gledalaca, a naročito:

a) naloži grupama gostujućih navijača kretanje određenim pravcem prilikom dolaska, odnosno odlaska iz sportskog objekta;

b) naloži organizatoru otklanjanje uočenih nedostataka sportskog objekta ili propusta u organizaciji;

c) zabrani ulazak na sportsku priredbu, odnosno udalji od sportskog objekta lice iz čijeg se ponašanja može zaključiti da je sklono nasilničkom i nedoličnom ponašanju.

(3) Policijski službenici su posebno ovlašteni:

a) da za lice koje se izjasni kao navijač ili nosi navijačke oznake ili za koje pretpostavlja da ide na sportsku priredbu, koje svojim ponašanjem izaziva osnovanu sumnju da je pod uticajem alkohola ili opojnih droga ili se drugačije protupravno ponaša, utvrde identitet, pretraže ga da li nosi alkohol ili opojnu drogu, pirotehnička sredstva, oružje i druga sredstva pogodna za nanošenje ozljeda ili uzrokovanje nasilja, nosi transparente, zastave i sl. koji sadržavaju rasističke ili druge poruke koje mogu izazvati nemire, oduzmu mu takve stvari, udalje ga iz sredstava javnog i drugog prometa i zabrane mu ulazak u sportski objekat, zadrže ga do isteka od tri sata nakon završetka sportske priredbe i prema istom poduzmu i druge mjere propisane ovim i drugim zakonima;

b) pregledati autobus, voz ili motorno vozilo koje prevozi navijače na sportsku priredbu, prilikom provođenja naredbi iz tačke a) ovog stava;

c) isključiti iz saobraćaja motorno vozilo, do isteka vremena od tri sata nakon završetka sportske priredbe, ako je lice iz tačke a) ovog stava vozač ili saputnik u motornom vozilu;

d) da gledaoca koji se protupravno ponaša zadrže u sportskom objektu do tri sata nakon završetka sportske priredbe i prema njemu poduzmu i druge mjere propisane ovim i drugim zakonom;

e) poduzeti mjeru zadržavanja na sportskom objektu ili poduzeti mjeru premještanja i prije završene sportske priredbe, ukoliko ocijene da je ugrožena sigurnost učesnika sportske priredbe;

f) zabraniti održavanje sportske priredbe, ukoliko nadležni policijski organ prije početka održavanja sportske priredbe procijeni da usljed protupravnog ponašanja učesnika u sportskom objektu ili u mjestu održavanja priredbe, prijeti opasnost za sigurnost učesnika sportske priredbe;

g) zatražiti od službenog lica koje je odgovorno za organizaciju sportske priredbe, da isprazni sportski objekat ili dio sportskog objekta na kojem je došlo do narušavanja javnog reda i sigurnosti učesnika sportske priredbe, odnosno da privremeno ili trajno prekine sportsku priredbu, ukoliko nadležni policijski organ procijeni da usljed protupravnog ponašanja učesnika u sportskom objektu za vrijeme održavanja sportske priredbe prijeti opasnost za sigurnost učesnika sportske priredbe većih razmjera.

Član 18.**(Prostor za privođenje i zadržavanje lica)**

(1) Policijski službenik će lice iz člana 17. stav (3) tačke a) i d) ovog zakona privesti i zadržati u službenim prostorijama policijskog organa ili drugom pogodnom prostoru.

(2) Pogodnim se smatra prostor koji ima sanitarni i vodoopskrbni uređaj i koji osigurava višesatan siguran boravak zadržanog lica.

(3) Prostor u kojem se zadržava lice iz stava (1) ovog člana mora biti pod neprekidnim nadzorom policijskog službenika.

Član 19.**(Troškovi za provođenje mjera)**

(1) Organizator snosi troškove koji se odnose na poduzimanje mjera iz članova 6. i 17. ovog zakona.

(2) Organizator može sa Ministarstvom zaključiti ugovor o obavljanju određenih poslova osiguranja sportske priredbe i provođenje određenih mjera za sprečavanje nasilja i nedoličnog ponašanja gledalaca, koji ne spadaju u redovne poslove održavanja javnog reda i mira.

(3) Ugovor iz stava (2) ovog člana u ime Ministarstva zaključuje ministar unutrašnjih poslova Tuzlanskog kantona.

(4) Prihodi ostvareni obavljanjem poslova i provođenjem mjera iz stava (2) ovog člana prihod su budžeta Kantona.

V. NADZOR**Član 20.****(Nadzor)**

Nadzor nad provođenjem ovog zakona vrši Ministarstvo.

VI. KAZNE NE ODREDBE**Član 21.****(Novčana kazna za organizatora i odgovorna lica)**

(1) Novčanom kaznom od 2.000,00 do 10.000,00 KM kaznit će se za prekršaj organizator ili drugo pravno lice, ako:

a) ne osigura da se sportska priredba povećanog rizika održi na odgovarajućem sportskom objektu (član 5. stav (6) ovog zakona);

b) ne osigura nesmetano održavanje sportske priredbe (član 6. stav (1) ovog zakona);

c) ne vrši nadzor nad provođenjem mjera utvrđenih ovim zakonom (član 6. stav (2) ovog zakona);

d) ne poduzme propisane preventivne mjere (član 7. ovog zakona);

e) ne obrazuje ili ne angažuje odgovarajuću redarsku službu (član 8. stav (1) ovog zakona);

f) odbije saradnju sa Ministarstvom i ne osigura prisustvo policijskih službenika (član 9. stav (1) ovog zakona);

g) ne osigura za vrijeme trajanja sportske priredbe prisustvo odgovarajuće službe hitne medicinske pomoći, vatrogasne jedinice ili ne ostvari saradnju sa drugim nadležnim organima i organizacijama (član 9. stav (2) ovog zakona);

h) ne osigura vođenje propisanih evidencija, odnosno ne pruži ih na uvid ovlaštenom licu Ministarstva (član 10. stav (1) ovog zakona);

i) ne poduzme propisane mjere kada su okolnosti ukazivale da postoji rizik da dođe do nasilja ili nedoličnog ponašanja gledalaca ili ne postupi po nalogima Ministarstva, u vezi održavanja sportske priredbe povećanog rizika (član 12. ovog zakona);

j) prodaje alkoholna pića suprotno zabrani (član 13. ovog zakona);

k) ne poduzme propisane mjere prije početka, za vrijeme trajanja i po završetku sportske priredbe povećanog rizika (član 14. ovog zakona);

l) prodaje ulaznice van odobrenih posebnih prodajnih mjesta (član 15. ovog zakona);

m) u svojstvu gostujuće ekipe ne poduzme zakonom propisane mjere (član 16. ovog zakona).

(2) Za prekršaj iz stava (1) ovog člana kaznit će se i odgovorno lice u pravnom licu novčanom kaznom od 200,00 KM do 1.000,00 KM.

(3) Za prekršaj iz stava (1) ovog člana fizičko lice registrovano za obavljanje sportskih djelatnosti kaznit će se novčanom kaznom od 200,00 KM do 1.000,00 KM.

(4) Pravnom licu kome je izrečena kazna za prekršaj iz stava (1) ovog člana može se, uz izrečenu kaznu, izreći i zaštitna mjera zabrane vršenja određenih poslova.

(5) Odgovornom licu kome je izrečena kazna za prekršaj iz stava (1) ovog člana može se izreći i zaštitna mjera zabrane vršenja određenih poslova.

(6) Fizičkom licu registrovanom za obavljanje sportskih djelatnosti, kome je izrečena kazna za prekršaj iz stava (1) ovog člana, može se izreći i zaštitna mjera zabrane obavljanja samostalne djelatnosti.

Član 22.**(Mjera zabrane prisustvovanja sportskim priredbama)**

(1) Licu koje je u evidencijama policijskih organa evidentirano da se ranije protivpravno ponašalo za vrijeme dolaska, održavanja ili odlaska sa neke sportske priredbe, sud, na prijedlog policijske stanice nadležne za mjesto održavanja sportske priredbe ili policijske stanice nadležne za područje na kome se nalazi prebivalište, odnosno boravište takvog lica, može izreći zabranu prisustvovanja određenoj sportskoj priredbi ili zabranu prisustvovanja sportskim priredbama koje se održavaju na području Kantona u trajanju od jedne do tri godine.

(2) Lice iz stava (1) ovog člana dužno je najkasnije dva sata prije početka određene sportske priredbe pristupiti u najbližu policijsku stanicu prema mjestu prebivališta odnosno boravišta, a ako je odsutno iz mjesta prebivališta odnosno boravišta, a nalazi se na području Kantona u najbližu policijsku stanicu i javiti se dežurnom policijskom službeniku te ga izvijestiti o adresi na kojoj će se nalaziti za vrijeme trajanja određene sportske priredbe, kao i za vrijeme do isteka dva sata nakon završetka te priredbe.

(3) Adresa iz stava (2) ovog člana ne može biti unutar područja od dva kilometra od sportskog objekta u kojem se održava sportska priredba za koju je licu izrečena zabrana iz stava (1) ovog člana, osim u slučaju kada to lice unutar navedenog područja ima adresu prebivališta, boravišta odnosno rada, ili u drugim opravdanim slučajevima.

Član 23.**(Novčana kazna za fizička lica)**

(1) Novčanom kaznom od 1.000,00 KM do 5.000,00 KM kaznit će se za prekršaj fizičko lice, ako:

a) fizički napada na učesnike sportske priredbe (član 4. stav (1) tačka a) ovog zakona);

b) kao učesnik sportske priredbe fizički se obračuna van terena (član 4. stav (1) tačka b) ovog zakona);

c) ističe obilježja, transparente, te uzvikuje slogane kojima se podstiče rasna, vjerska, nacionalna ili druga netrpeljivost i mržnja, odnosno čiji je sadržaj uvredljiv i nepristojan, a što može da dovede do fizičkih sukoba navijača ili drugih učesnika, te ugrozi život ili integritet lica, odnosno oštećenje ili uništenje imovine, te paljenje navijačkih obilježja (član 4. stav (1) tačka d) ovog zakona);

d) oštećuje sportski objekat na kome se odvija sportska priredba, njegovu opremu, uređaje, instalacije i drugi inventar (član 4. stav (1) tačka e) ovog zakona);

e) baca bilo kakav predmet na sportski teren ili u gledalište, ili ometa odvijanje sportske priredbe posebnim pirotehničkim sredstvima ili drugim napravama (član 4. stav (1) tačke c), f), g) i h) i stav (2) tačka d) ovog zakona);

f) neovlašteno ulazi u sportski teren (član 4. stav (2) tačka a) ovog zakona);

g) za vrijeme održavanja sportske priredbe, kao i neposredno prije ili poslije održavanja sportske priredbe, neovlašteno ulazi u službene prolaze sportskog objekta na kome se odvija sportska priredba (član 4. stav (2) tačka b) ovog zakona);

h) za vrijeme održavanja sportske priredbe unosi u sportski objekat ili upotrebljava alkohol ili opojna sredstva (član 4. stav (2) tačka c) ovog zakona);

i) neovlašteno uđe u dio gledališta namijenjen suparničkim navijačima i neovlašteno koristi dronove (član 4. stav (2) tačke e) i f) ovog zakona);

j) ne postupi po nalozima službenog osoblja iz člana 8. stav (2) ovog zakona;

k) postupi suprotno obavezi iz člana 22. ovog zakona.

(2) Uz kaznu za prekršaj, iz stava (1) tačke a), b), c), d), e), f) i g) ovog člana, fizičkom licu se može izreći zaštitna mjera zabrane prisustvovanja određenim sportskim priredbama.

(3) Ako prekršaj iz stava (1) ovog člana učini maloljetnik, primjenjuju se propisi koji tretiraju ovu oblast.

(4) Roditelj, usvojlac, odnosno staratelj maloljetnika mlađeg od 16 godina, koji učini prekršaj iz stava (1) ovog člana, ako je izvršenje prekršaja od strane maloljetnika posljedica njegovog propuštanja dužnog staranja o maloljetniku, a bio je u mogućnosti da takav nadzor vrši, kaznit će se za prekršaj novčanom kaznom u iznosu od 100,00 KM do 500,00 KM.

VII. ZAVRŠNE ODREDBE

Član 24.

(Usklađivanje općih akata)

Sportske organizacije uskladit će svoja akta sa ovim zakonom u roku 60 dana od dana stupanja na snagu ovog zakona.

Član 25.

(Stupanje na snagu ovog zakona)

Ovaj zakon stupa na snagu osmog dana od dana objavljivanja u „Službenim novinama Tuzlanskog kantona“.

Bosna i Hercegovina
- Federacija Bosne i Hercegovine -
TUZLANSKI KANTON
Skupština

Broj: 01-02-350-10/16
Tuzla, 30.11.2016. godine

PREDSJEDNIK
Skupštine Tuzlanskog
kantona,

Senad Alić, v.r.

904

Na osnovu člana 24. stav 1. tačka c) Ustava Tuzlanskog kantona („Službene novine Tuzlansko-podrinjskog kantona“, br. 7/97 i 3/99 i „Službene novine Tuzlanskog kantona“, br. 13/99, 10/00, 14/02, 6/04 i 10/04), na prijedlog Vlade Tuzlanskog kantona, Skupština Tuzlanskog kantona, na sjednici održanoj 30.11.2016. godine, d o n o s i

Z A K O N

O IZMJENAMA I DOPUNAMA ZAKONA O UNUTRAŠNjim POSLOVIMA TUZLANSKOG KANTONA

Član 1.

U Zakonu o unutrašnjim poslovima Tuzlanskog kantona („Službene novine Tuzlanskog kantona“, br. 4/10, 5/11, 14/11, 2/12, 8/13, 10/14 i 9/15), iza člana 18. dodaje se novi član 18a., koji glasi:

„Član 18 a.

(Specijalna kasa)

(1) Za izvršenje određenih poslova iz člana 18. stav 1. tačka b) ovog zakona formira se specijalna kasa.

(2) Iznos finansijskih sredstava potrebnih za korištenje specijalne kase utvrđuje Vlada Kantona.

(3) Finansijska sredstva za specijalnu kasu, na prijedlog policijskog komesara, osiguravaju se na budžetskoj poziciji Ministarstva, dok se ne steknu uslovi za implementaciju člana 6. ovog zakona.

(4) Na prijedlog policijskog komesara, ministar propisuje uslove, način i postupak korištenja odobrenih finansijskih sredstava, kao i druga pitanja koja su od značaja za funkcionisanje specijalne kase.“

Član 2.

U članu 55. u stavu (1), riječi „sve žalbe“ zamjenjuju se riječima „žalbe građana i pravnih lica“.

U istom članu stav (4), briše se.

Član 3.

U članu 88. riječi „budžetske 2017. godine“ zamjenjuju se riječima „budžetske 2018. godine“.

Član 4.

Ovaj zakon stupa na snagu osmog dana od dana objavljivanja u „Službenim novinama Tuzlanskog kantona“.

Bosna i Hercegovina
- Federacija Bosne i Hercegovine -
TUZLANSKI KANTON
Skupština
Broj: 01-02-485-5/16
Tuzla, 30.11.2016. godine

PREDSJEDNIK
Skupštine Tuzlanskog
kantona,

Senad Alić, v.r.

905

Na osnovu člana 24. stav 1. tačke c) Ustava Tuzlanskog kantona („Službene novine Tuzlansko-podrinjskog kantona“, br. 7/97 i 3/99 i „Službene novine Tuzlanskog kantona“, br. 13/99, 10/00, 14/02, 6/04 i 10/04), na prijedlog Vlade Tuzlanskog kantona, Skupština Tuzlanskog kantona, na sjednici održanoj 30.11.2016. godine, d o n o s i

Z A K O N

O IZMJENAMA I DOPUNAMA ZAKONA O SOCIJALNOJ ZAŠTITI, ZAŠTITI CIVILNIH ŽRTAVA RATA I ZAŠTITI PORODICE SA DJECOM

Član 1.

U Zakonu o socijalnoj zaštiti, zaštiti civilnih žrtava rata i zaštiti porodice sa djecom - prečišćeni tekst („Službene novine Tuzlanskog kantona“, br. 5/12, 7/14 i 11/15), u članu 6. u stavu 2., u podnaslovu 10. iza člana 38., u članu 39. u st. 1. i 2., u članu 44. u stavu 2., u članu 47. u st. 3. i 4., u članu 49., u članu 52. u stavu 1. u alinejama 4. i 16., u članu 79., u članu 101. u stavu 4., u članu 118. u stavu